

Formasaun animadór sira nian

Outubru 2015

5

NA'I FÓ BEE IDA MAI HA'U...

(Jo 4,5-26)

Fraze ida ne'e foti husi diálogu naruk ne'ebé Jezús iha ho feto samaritana ida, besik Jacob nia be-matan. Loloos, iha pasajen ida ne'e, Jezús loke diálogu ho ema oinoi: feto samaritana, eskolante sira, ema sira ne'ebé mai husi knua. Ema bele hasoru Jezús liuhusi diálogu, ita, nu'udar animadór, bele lori labarik no foin-sa'e sira atu hasoru Jezús liu husi diálogu, se ita rasik rekoñese katak ita mós hamrook kona-ba Maromak nia prezensa no ita rasik presiza bee moris rohan laek nian.



Jo 4,5-26

Iha pasajen ida ne'e, Jezús mak protagonista boot! Iha ema barak ne'ebé mosu no ko'alia hamutuk ho Jezús, ida-idak lori ninia problema ka ida-idak hato'o topiku diferente, maibé iha buat hotu ne'e, Jezús mak sentru nafatin, ne'ebé prezente nafatin no hatudu ninia An neineik. Ema sira ne'ebé hakbesik Nia iha sira-nia hanoin kona-ba Maksoin, ida-idak hato'o buat ne'ebé nia hein husi Mesias ida ne'e no Jezús akompaña sira atu hadi'ak sira-nia ideia hodi tama iha Maromak nia projetu.

Fou-foun, pasajen ida ne'e hatudu Jezús ne'ebé iha nesiedade sira, hanesan ema hotu: nia kolen, nia hamrook no hamlaha. Bele dehan katak Nia hatudu ninia An

nu'udar ema fraku, ne'ebé presiza. Nia bele hatudu ninia poder ka ninia forsa, maibé iha momentu ida ne'e, Nia hahú diálogu husi ninia frakeza ka limitasaun: tanba Nia hamrook, nia husu ba feto samaritana ne'e, ne'ebé hakfodak hodi haree mane ida ne'ebé ko'alia ba nia.

Estilu ne'ebé Jezús hatudu mak estilu misionariu ida-idak nian: Nia hahú hodi husik ema sira ko'alia, Nia rona ho atensaun, maski Nia, nu'udar Maromak, hatene ona istória sira ne'ebé ema haktuir, no neineik tulun sira atu "lee" realidade ne'ebé sira hato'o ho Maromak nia matan.

Iha diálogu sira ne'e, bele haree katak Jezús la mai atu hatán ba ema nia presiza, atu fó buat ne'ebé sira kuran, maibé, uluknanain, Nia mai atu kria fali relasaun entre Maromak no ema sira.

Ho diálogu ida ne'e, Jezús kria korente ida: tanba feto samaritana sente katak Jezús hatán ba ninia hakarak (maski la tuir ninia dalan!), nia ba haklaken, fó sasin ba povu sira iha ninia knua. Enkontru loos ho Jezús halo ema sai misionariu, sai ema ne'ebé hakarak haklaken domin ne'ebé nia rasik halo esperiênsia.

REFLETE liuhusi ESPERIÉNSIA SALEZIANA

Nune'e, misaun salesiana, tuir Fundadór nia intuisaun, komprende ema tomak no mundu tomak. *dom Bosco nia laran manas pastorál misionária* tau matan ba foin-sa'e tomak, iha ninia komponentu tomak: pesoál no sosiál, no ba foin-sa'e hotu iha mundu rai-klaran. Hori uluk kedas, iha Kongregasaun salesiana, mosu hilin atu ba hasoru foin-sa'e sira iha situasaun no fatin iha ne'ebé sira hela ba atu haklaken Evanjellu.

"Kuardru refere nian...", paj. 27.

Prezente preferensiál ba juventude marka ho impulsu misionáriu ida hahú kedas nia orijen, tan ne'e mak karizma iha kbiit atu habelar iha kultura oioin ne'ebé nia halo kontaktu.

LOME 34

Membru sira grupu hotu Família saleziana nian, foin-sa'e sira no adultu sira, konsagrada sira, konsagradu sira, leigu no leiga sira, tenke serbisu hamutuk ho projetu ne'ebé koordena iha koresponsabilidade atu promove MJS nu'udar dalan ne'ebé hatudu Família saleziana tomak nia empeñu edukativu no misionáriu.

LOME 129

Iha realidade ne'ebé plurikultural no plurirelijiozu ba beibeik perspetiva evangelizadora konvida atu hafoun paixaun ba anúnsiu dahuluk, katekeze, misaun ad gentes, hahú husi evanjellu, husi Kreda nu'udar comunidade ho knesan ema nian ne'ebé revela an nu'udar sinál no instrumentu Reinu Maromak nian, husi diálogu ho kultura no relijiaun sira.

LOME 49

Dimensaun evangelizadora pastorál juvenil nian, tuir lójika proposta nian no misionária, rekere projesaun ida ne'ebé fó priviléjiu ba evanjellu nia anúnsiu nu'udar lia-foun di'ak ba foin-sa'e sira hotu nia moris, la'ós de'it ba sira ne'ebé mai beibeik ita-nia ambiente edukativu sira. Tan ne'e, ita nia proposta, oferese dalan lahanesan ne'ebé bele hatán ba sensibilidade oioin foin-sa'e feto no mane sira-nian: ba sira ne'ebé tenke rona anúnsiu dahuluk nian eh ba sira ne'ebé hahú filafali atu sai sarani, ba sira ne'ebé sosializa tiha ona husi pontudevista relijiozu eh sira ne'ebé hetan diskriminasaun no iha difikuldade laran.

LOME 79

Konversaun misionaria loos no réal husu ba Pastorál Juvenil Salesiana atu deskobre no moris tuir relasaun kle'an (ne'ebé la bele haketak) entre asaun edukativa no asaun evangelizadora

"Kuardru refere nian...", paj. 59

Iha urjénsia atuál kona-ba *Evanjelizasaun Foun* tenke rekomenda Dom Bosco nia espíritu misionariu kona-ba asaun pastorál: espíritu misionariu ne'ebé dudu to'o fatin iha ne'ebé seida'uk tau matan ba foin-sa'e sira-nia presiza no pergunta sira.

"Kuardru refere nian...", paj. 65

Nakloke ba vokasaun misionaria, no karidade nia empeñu sosiál iha voluntariadu, sai espresaun tasak husi edukasaun fiar nian no evanjelizasaun foin-sa'e sira nian.

"Kuardru refere nian...", paj. 157

PERGUNTA ruma atu bele haburas ita-nia esperiénsia nu'udar animadór

- Nu'udar animadór, ita hatene aplika estilu diálogu nian, ne'ebé Jezú hatudu, ba ita-nia oratorianu sira, no ba foin-sa'e sira ne'ebé sei dook husi Kreda no ita-nia atividade? Atitude sa de'it presiza dezentolve atu favorese estilu diálogu nian iha ita-nia comunidade sira?
- Oinsá ita haburas sensibilidade misionaria ne'ebé hori uluk kedas Dom Bosco no Madre Mazzarello hakle'an iha Valdocco no Mornese?
- Iha fatin ruma ka iha ita-nia realidade ruma ne'ebé sadik ita-nia "vokasaun misionaria"? (Amo Bispo Basilio, durante serimonia atu taka Bisentenariu Dom Bosco nia moris nian, interpela Família Salesiana atu hatán ba situasaun rua: família, no labarik barak ne'ebé, oras ne'e, iha Dili, moris iha dalan). Nu'udar animadór, bele halo saida atu hatán ba situasaun no realidade hirak ne'e?

ORASAUN: Nu'udar grupu animadór sira nian, ita hakerek orasaun ida atu aumenta espíritu misionariu.

